

ՀՈՎՀԱՆՆԵՍ ԹՈՒՄԱՆՅԱՆԸ ԵՎ ՀԱՅ ԳՐԱԴԱՆՈՒԹՅԱՆ
ԿՈՎԿԱՍՅԱՆ ԸՆԿԵՐՈՒԹՅՈՒՆԸ

ՍՈՒՍԱՆԱ ՀՈՎՀԱՆՆԻՍՅԱՆ

Մինչև Թումանյանը մեզանում եղել էին դրական միություններ ստեղծելու բազմաթիվ փորձեր, որոնց նախաձեռնողներն էին Ստ. Նաղարյանը, Մ. Նալբանդյանը, Մ. Պեշիկթաշլյանը, Խ. Պատկանյանը, Գր. Արծրունին: Բայց միայն Թումանյանին հաջողվեց 1912 թ. հոկտեմբերին հիմնել սեփական կանոնադրությամբ, պաշտոնապես հաստատված գրողների և գրական գործիչների կազմակերպություն, որը հսկայական ազդեցություն ունեցավ հայ ամբողջ գրական պրոցեսի վրա: Դա պայմանավորված էր թե՛ Թումանյան գործչի գրական-հասարակական շարժումներ ղեկավարելու տաղանդով և թե՛ ժամանակի պահանջով:

Մեր դարասկզբին առաջացել էր համազգային հզոր շարժում, որի նպատակը հայկական մշակույթի արժեքների վերհանումն ու նոր ազգային արվեստ ստեղծելն էր: Այս խնդրի լուծմանը կարելի էր հասնել ժողովրդի ինքնաձևանայման և ինքնագիտակցության բարձրացման, ազգային արվեստում ինտերիուր, գունելու և այն հայ հասարակության մեջ տարածելու ճանապարհով: Ընկերության երեկույթների բացման իր խոսքում Հ. Թումանյանը ասում էր. «Կխոսենք, կմտածենք, կխորհրդածենք, թե ո՞վ ենք մենք, ո՞րտեղից ենք դալիս, ո՞ւր ենք դնում, ի՞նչ ունենք... և ի՞նչ չունենք»¹: Թումանյանի շնորհիվ Հայ գրողների կովկասյան ընկերությունը հետագա ծանր տարիներին կարողացավ պահպանել գոյությունը և իր գործունեությամբ դարձավ նոր գրական շարժման կենտրոն: Պատահական չէ, որ հենց Թումանյանը պիտի ղեկավարեր այդ ընկերությունը՝ նախ, գրական նոր շարժումը, որի արդյունքը ընկերության բացումն էր, մեծ չափով նախապատրաստել էր ինքը՝ Թումանյանը («հինգաթիթների»², «վերնատան» պարապմունքներով): Երկրորդ՝ մեծ նըշանակություն ուներ գրողի անհատական խառնվածքը: Հայտնի է, որ մեր գրողներից ամենից շատ Թումանյանն էր սիրում իր մտորումները կիսել գրչուկից ընկերների հետ, պատմել նրանց իր ստեղծագործական ծրագրերի մասին, հաշվի էր նստում ընթերցողի կարծիքի հետ: Ստ. Զորյանի խոսքերով առաջ՝ նա «գերազանցապես հասարակական խառնվածքի տեր մարդ էր»³: Նույնն է վկայում նաև Դ. Դեմիրճյանը, ասելով՝ «Թումանյանը իր ժամանակի ամենահասարակական գրողն էր...

Անգամ ստեղծագործելիս նա կենդանի կապ ուներ ընթերցողի հետ... Կարելի է ասել, Թումանյանը ստեղծագործում էր հրապարակայնորեն, մի տեսակ կոլեկտիվ կերպով»⁴:

Ընկերության կարևոր նպատակներից մեկը տարբեր գրողների, գրողի և դրական քննադատության, գրականության և ժողովրդի միջև անմիջական կապի ստեղծումն էր: Յուրաքանչյուր շաբաթ և հինգշաբթի տեղի ունեցող գրական երեկույթների և դասախոսությունների կազմակերպիչը հիմնականում Թումանյանն էր: Բոլոր երեկույթները մշտապես ուղեկցվում էին գրական բա-

1 Հ. Թումանյան, Երկերի ժողովածու, հ. 4, Երևան, 1951, էջ 442:

2 Ա. Իսախանյան, Հովհաննես Թումանյան, Կյանքի և ստեղծագործության պատմություն, Երևան, 1979, էջ 412:

3 «Թումանյանը ժամանակակիցների հուշերում», Երևան, 1969, էջ 114:

4 Դ. Դեմիրճյան, Երկեր, հ. 8, Երևան, 1963, էջ 129:

նավեճերով և մեծ խանդավառություն ու «աննախընթաց եռուզեռ»⁵ էին առաջացնում հասարակության մեջ: «Եվ այդ ամբողջ եռուզեռի, ոգևորության շունչն ու հոգին անխոնջ եռանդով լի Թումանյանն էր»⁶: Ընկերության հիմնական խնդիրը գրական նախորդների, հայ դասական գրականության արժեքների, անցյալի լավագույն ավանդների վերագնահատումն ու վերհանումն էր: Վերջինս հնարավորություն կտար նպաստել նոր գրականության դարգացմանը: Ինչպես գրում էր մամուլը՝ նկատի ունենալով ընկերության երեկույթների միայն առաջին տարեշրջանը, «Սկսված է մի վերագնահատության ընդարձակ շրջան, որից նախում է ըննադատական միտքը, որ սրվելով գրական երեկույթների գնահատության շրջանում չի դանդաղի անցնելու կյանքի մյուս ոլորտները և իր լույսը սփռելու մեր կյանքի բազմազան երևույթների վրա»⁷: Այս ուղղությամբ ընկերությունը կազմակերպեց դասախոսություններ՝ նվիրված Լաֆոն, Սունդուկյանին, Մերենցին, Դուրյանին, Նալբանդյանին, Պատկանյանին, Արուստիյանին:

Սայաթ-Նովայի արվեստի նկատմամբ Թիֆլիսի հայ և վրացի ողջ հասարակության մեջ արթնացած հսկայական հետաքրքրությունը արդյունք էր ընկերության՝ Սայաթ-Նովային նվիրած երեկույթների և դասախոսությունների նախաձեռնողը դարձյալ Թումանյանն էր: Առաջինը նա 1913 թ. մարտի 1-ի վարչության նիստում «Հայտարարելով մեր նշանավոր բանաստեղծ Սայաթ-Նովայի նշանակությունը հայ գրականության համար՝ հայտնում է, որ վարչությունն որոշել է կազմակերպել գրական երեկույթ նրա հիշատակին ու մահաբանական գնահատմանը նրա գերեզմանի վրա «Կաթողիկե» եկեղեցու զավթում»⁸: Ստեղծվում է մահաբանի բացման հատուկ մասնաժողով, որի կազմում էին Գևորգ Բաշինջաղյանը, Նվարդ Թումանյանը, Վահան Տերյանը, Դերենիկ Դեմիրճյանը, Արմեն Տիգրանյանը և ուրիշներ: Միջնադարի բանաստեղծին նրվիրված երեկույթների, նրա մահաբանի բացման, ձեռագրերի հրատարակման և տարածման, Սայաթ-Նովայի հետ կապված դանադան հարցերի շուրջ մարբեր բնույթի որոշումներ են կայացվել վարչության 23 նիստերում, նույնմբերի 14-ի ընդհանուր ժողովում: Դրանով պետք է բացատրել այն համոզմունքը, որ խանդավառությունը, որն առաջացել էր ընկերության շուրջը: Այդ ոգևորության արտահայտությունն էին նաև բազմաթիվ նվիրատվությունները, որ ստանում էր ընկերությունը: Նվիրատուների թվում էին նաև Գևորգ Ախվերդյանի քույրն ու աղջիկը՝ Մանե և Աննա Ախվերդյանները: Գ. Ախվերդյանի ժառանգներից է Հ. Թումանյանը ստանում Սայաթ-Նովայի ձեռագիր զավթարը: Ինչպես իրավացիորեն նկատում է Տ. Կարապետյանը, «Հ. Թումանյանը և Վրաստանը» հոգվածում՝ սայաթնովագիտությունը շատ բանով է պարտական Հ. Թումանյանին: Իրոք, Գևորգ Ախվերդյանից հետո որոշ իմաստով Թումանյանին պետք է համարել Սայաթ-Նովայի երկրորդ հայտնագործողը: Մահաբանի բացումը սեղի ունեցավ 1914 թ. մայիսի 15-ին, որը անպատմելի ոգևորություն առաջացրեց Թիֆլիսի բազմազգ հասարակության մեջ: Դրա լավագույն վկայությունն այն է, որ հիշյալ հանգեսը ավանդույթ դառնալով, շարունակվում է մինչև օրս «Վարդատոն» անվան տակ: Այս անվանման հիմքում ընկած է Թումանյանի այն օրերին արված կոչը, որով նա առաջարկում էր վարդերի սիրահար աշուղին այցելել վարդերով: Իոսեփ Գրիշաշվիլու խոստովանությամբ, Սայաթ-Նովայի այդ տոնակատարությունը ստիպեց նրան ձեռնամուխ լինել շորս տարվա աշխատանքի, որի արդյունքը եղավ Սայաթ-Նովա-

5 Վ. Ա. Գևորգյան, Հ. Թումանյան, Մարդը և բանաստեղծը, Բոստոն, 1936, էջ 136:

6 Նույն տեղում:

7 «Հորիզոն», 13. II. 1913:

8 Լ. Զարենցի անվան գրականության և արվեստի թանգարան (այսուհետև՝ ԳԱԹ), Հայ գրողների կովկասյան ընկերության ֆոնդ, № 266:

9 «Թումանյան, ուսումնասիրություններ և հրապարակումներ», հ. 1, Երևան, 1964, էջ 241:

յի ստեղծագործությունների վրացերեն հրատարակությունը և 1918 թ. առանձին գրքով Սայաթ-Նովայի մասին իր մենագրության լույս ընծայումը¹⁰։

Բացի Սայաթ-Նովային նվիրված երեկույթներից, ընկերությունը դասախոսություններ կազմակերպեց հին բանաստեղծություն, մեր պատմիչների փիլիսոփայական աշխարհայացքի, նարեկացու և հայ միջնադարի այլ հեղինակների ու հարցերի շուրջ։ Միջնադարը մինչ այդ այնպիսի մեծ ուշադրության չէր արժանացել, ինչպես ընկերության գործունեության տարիներին։ Սակայն վարչությանը և նրա նախագահին մտահոգում էր հայ գրականության արդի վիճակը և նրա ապագան։ Այդ ուղղությամբ ընկերությունը կազմակերպեց երեկույթներ ու դասախոսություններ՝ նվիրված Շանթին, արևմտահայ գրականությանը, Գ. Զոհրապին, Վ. Տերյանին, Ալ. Մատուրյանին, Ա. Զոպանյանին, Շիրվանդադեհին, Ավ. Իսահակյանին, Սիամանթոյին ու Վարուժանին, հեթանոսական շարժմանը, հայ գրականության և մշակույթի ապագային նրա վերված դանդաղ հարցերի։

Հայ գրողների կովկասյան ընկերության հիմնադրումից ընդամենը երկու ամիս անց՝ 1912 թ. դեկտեմբերի 30-ին, ստեղծվեց Հայոց երաժշտական ընկերությունը, որը լինելով ընդհանուր մշակութային շարժման արտահայտություն, չէր կարող նաև հայ գրողների ընկերության առաջացրած ընդհանուր ոգևորության արդյունք չլինել։ Այլ Սպենդիարյանի հետ միասին Թումանյանը տարիներ շարունակ այս ընկերության պատվալուր անդամն էր։ Նա հիվանդության պատճառով չմասնակցեց ընկերության բացման արարողությանը, բայց իր լիախոր շնորհավորանքներն ուղարկեց բաց նամակով, որում ասվում էր. «Բարով է գալիս Գրական ընկերության հրաշալի քույրը»¹¹։ Նույնի ազդեցությունն ու Թումանյանի ջանքերին պետք է վերագրել 1914 թ. մարտի 19-ին Հայոց պատմական և հնագիտական ընկերության բացումը։

Բայց հայ գրողների միությունը մինչ ընդհանուր աղգային-մշակութային շարժմանը նպաստելը դարձավ համահայկական գրական շարժման կենտրոն, որն իբրև «մայր ընկերություն» ղեկավարում էր նրեանում, Աշտարակում, Գորիսում, Աստրախանում, Գորիում, Բաքվում և այլուր ստեղծված գրական խմբակները։ Ինչպես վկայում է Ն. Ֆրանգյանը, «գրական ուշագրավ շարժմանը առն և կենդանություն տվողը Հայ գրողների ընկերությունն է, որը շատ կարճ ժամանակամիջոցում այնքան հռչակ ստացավ»¹²։

1912 թ. նոյեմբերի 12-ին Բաքվի մարդասիրական ընկերության շենքում հայ գրողների ժողովը ողջունեց Թիֆլիսի հայ գրողների կովկասյան ընկերությանը, ներկաներից շատերը առաջարկեցին դիմել Թումանյանին Բաքվում հիմնելու Հայ գրողների կովկասյան ընկերության մասնաճյուղ կամ գործակալություն։ Չայների մեծամասնությամբ ընդունվեց վերջին առաջարկը։ Բաքվում ստեղծված գրական աշխուժության մասին կարողում ենք Ցոլակ Խանդադյանի 1913 թ. փետրվարի 16-ի նամակում. «Վերջերս այստեղ մեծ հետաքրքրություն է առաջ եկել դեպի հայկական կյանքն ու գրականությունը։ Անսխալ կարելի է պնդել, որ այստեղի նեխած մթնոլորտը շարժման մեջ է. կուլտուրական վերածնության շրջանի նախօրյակին ենք... Եթե հարկավոր է, մենք կարող ենք նույնիսկ այդ ֆիրմայի (Հ. Գ. Կ. Ը.) տակ դուրս գալ,—այդ դադափարը հասարակության մեջ արժարժելու նպատակով։ Կարող ենք ասել, որ դասախոսներին տալիս է Հայ գրողների ընկերության տեղական ճյուղը, այդ մասին կարող ենք ասել և առանց պաշտոնական թույլտվություն ունենալու»¹³։

Հայ գրողների կովկասյան ընկերության վարչության 1913 թ. հունվարի 13-ի նիստում առաջարկություն է արվում փոփոխել կանոնադրությունը և ձգտել իրավունք ստանալ գավառներում ճյուղեր բանալու։ Սակայն Թուման-

¹⁰ «Թումանյանի ժամանակակիցների հուշերում», էջ 662։

¹¹ Հ. Թումանյան, Երկերի ժողովածու, հ. 5, Երևան, 1945, էջ 382։

¹² «Հորիզոն», 9. XII. 1915։

¹³ ԳԱԹ, Թումանյանի ֆոնդ, № 49։

յանը տեսնելով, որ հարցը կարող է զրականորեն լուծվել, առաջարկում է Բաքվի, հետագայում նաև Երևանի, գրասերներին կապ պահպանել Թիֆլիսի ընկերության հետ. «Կարծում եմ լավ կլինի, — գրում է նա, — եթե հավաքվենք և կազմենք մի գրական շրջան, սկսեինք գործել, ունենալ գրական երկույթներ և ինչ որ կարող ենք, մինչև կկարողանայինք իրավունք ստանալ բաժանմունք ունենալու»¹⁴։ Այս մասին Թումանյանը գրում է Յ. Խանզադյանին, Հ. Մանսգյանին, գրուցում է Ռ. Օհանջանյանի հետ Դ. Անանունը և Բաքվի գրական ընկերության մյուս նախաձեռնողները՝ Հովհ. Հովհաննիսյանը, Տ. Հովհաննիսյանը և ուրիշներ Թումանյանի խորհուրդը համարում են «անպայման նպատակահարմար և իրագործելի»¹⁵։ «Պիտի ասեմ, — գրում է Դ. Անանունը Թումանյանին 1913 թ. մարտի 3-ին, — որ անցյալ տարվա ղեկտեմբերից արդեն այդպիսի համախմբումներ ունենք։ Հայ գրական ընկերությանը անդամագրվելու շուրջը տեղի ունեցած ժողովները խթան եղան, որ այստեղ հրապարակ գա մի ինքնուրույն գիտական-գեղարվեստական ընկերություն հիմնելու խնդիրը»¹⁶։ Եվ դառնյալ Թումանյանն առաջինն է շտապում ողջունել հայ գրասերների այդ նախաձեռնությունը՝ «Բաքվի ծախ» թերթի միջոցով. «Շատ լավ տպավորություն է անում էստեղ էլտեղի նոր գրական շարժումը»¹⁷։

Բաքվի գրասերներին հաջողվում է ընկերություն ստեղծել 1915 թ.¹⁸։ Այն իր գոյության ողջ ընթացքում մշտական ու սերտ կապերի մեջ էր Հայ գրողների կովկասյան ընկերության հետ։

Հայության տարբեր հատվածներում առաջացած գրական միավորումները միմյանց հետ կապ պաշտպանում էին Հայ գրողների կովկասյան ընկերության միջոցով։ Հաճախ նույն շրջանում Թիֆլիսում, Պոլսում, Երևանում, Բաքվում ընթերցվում էին նույն թեմաներով դասախոսություններ, Գրական նախասիրությունների և հետաքրքրությունների ընդհանրությունը դարձյալ մեծ նպաստ պայմանավորվում էր Հայ գրողների կովկասյան ընկերության գործունեությամբ և առաջացրած արձագանքներով։ Այս հարցում ևս մեծ էր ընկերության նախագահի դերը։ Թումանյանը ձեռնարկելով հայ գրականության կուրսեր բացել Թիֆլիսում, դիմում է Բաքվի Հայ գրասերների միության նախագահ Տիգրան Հովհաննիսյանին. «Արդյոք չի՞ կարելի, որ միանանք մենք ու Գրասերների ընկերությունը — երկու սեմեստր, և էստեղ պահենք և էլտեղ... Միասին հեշտ կպահենք և ավելի ուժեղ»¹⁹։

Թումանյանի նախագահած ընկերության շնորհիվ հայ գրականության նկատմամբ հսկայական հետաքրքրություն առաջացավ նաև բուն հայրենիքում։ Մարգար Սկեռնիսյանի՝ Թումանյանին ուղղած նամակից տեղեկանում ենք, որ 1914 թ. փետրվարի 2-ին Երևանում տեղի է ունեցել խորհրդակցություն տեղում գրական միավորում հիմնելու կապակցությամբ։ Նա գրում է. «Այստեղ մի քանի գրողների և շատ գիտնականների մեջ փափագ է դարձնել

¹⁴ Հ. Թումանյան, Երկերի ժողովածու, հ. 5, էջ 385։

¹⁵ ԴԱԹ, Թումանյանի ֆոնդ, № 242։

¹⁶ Նույն տեղում։

¹⁷ Հ. Թումանյան, Երկերի ժողովածու, հ. 5, էջ 387։

¹⁸ 1915 թ. մայիսի 27-ի վարչության նիստում Հ. Թումանյանը հայտնում է, որ Բաքվի հայ գրասերների միության մայիսի 28-ի հիմնադիր ժողովին մասնակցելու հրավեր է ստացվել։ Վերջինս ուղարկել է նորընտիր միության նախագահ Տիգրան Հովհաննիսյանը։ Նա ընկերության հասցեով հղված պաշտոնական նամակին կցել է կանոնադրության մի օրինակ։ Եվ, իրոք, 1915 թ. մայիսի 28-ին Բաքվում, ի վերջո, Հովհաննես Հովհաննիսյանի, Սառա Սաղյանի, Կատարինա Բա-հաբուրի, Աստվածատուր պաշյանի, Երվանդ Թադիանոսյանի և Մխիթար Տեր-Անդրեասյանի ջանքերով հիմնվում է Հայ գրասերների միությունը։ Այս անվանումն իսկ հուշում է, որ ընկերությունը ոչ թե գրողների, այլ գրականությունը սիրողների խմբավորում էր։ Վերջինս իրավունք ուներ կազմակերպել դասախոսություններ, գրական գրույցներ, թոշակ տալ կարիքավոր գրողներին և այլն։

¹⁹ Հ. Թումանյան, Երկերի ժողովածու, հ. 5, էջ 414։

ստեղծելու մի գրական մթնոլորտ, հետաքրքրվելու հայ գրական կյանքով և սերտ շփումն հաստատելու հայ գրական կենտրոնի հետ. նրանից թարմություն ու ոգևորություն ստանալու համար»²⁰։ Երևանի գրասերները ևս ձեռնարկում էին հետաքրքրություն արթնացնել հայ գրական կյանքի նկատմամբ, դասախոսություններ կազմակերպել և այլն։ «Այդ նպատակին հասնելու համար ամենահարմար միջոցը համարվեց տեղում հիմնել Հայ գրողների ընկերության ճյուղ և հանձնարարվեց ինձ գրել և տեղեկություն ստանալ, թե արդյոք մենք բոլոր կանոնադրության իրավունք ունենք ճյուղ հիմնելու և երկրորդ՝ ինչ հիմունքներով...», — գրում է Մ. Ավետիսյանը²¹։ Իհարկե, նրանք կարող էին հիմնել և անկախ գրասիրաց ընկերություն, բայց նպատակահարմար էին գտնում հիմնել ճյուղ, քանի որ փափագում էին վայելել Թիֆլիսի «Գրական ընկերության զորեղ հովանավորությունը»²², որպեսզի ունենան «հեղինակավոր դիրք ու հարստե կյանք»²³։ Թումանյանը պատասխանում է, որ ճյուղեր ունենալու իրավունք զեռ չի ստացվել և խորհուրդ է տալիս կազմակերպել անկախ գրասերների ընկերություն Երևանում։ Ընդ որում, Թումանյանը, գրողներին տարաշխարհիկ և բնաշխարհիկ խմբերի բաժանող քննադատը, Երևանում առաջացած գրական շարժմանը ավելի մեծ նշանակություն էր տալիս, քան հայրենիքի սահմաններից դուրս ազգային-մշակութային շարժմանը, թեև դարասկզբին հայ գրականությունը շարունակում էր վարզանալ հիմնականում գաղթօջախներում։ Մ. Ավետիսյանին ուղղած նամակում Թումանյանը գրում է. «Քեզ պետք է ասեմ, որ ես ուրիշ կարծիքի եմ Երևանի մասին... Մեծ, շատ մեծ կարևորություն ունի մեր բնիկ քաղաքներում ամեն մի էգ տեսակ կուլտուրական ձեռնարկություն»։

Յնծագին պետք է ողջունենք էստեղից ձեր գրասիրաց ընկերության բացումը»²⁴։

2. Թումանյանի ընտանեկան արխիվում է գտնվում Երևանից նվարդ Թումանյանին ուղղված Պողոս Մակինցյանի նամակը, որում ասվում է. «Մենք մի փոքրիկ ընկերություն ենք կազմել այստեղ հայոց գրականությունը սիրողներին։ Առաջիմ ուրիշ մի ընկերության գրողակի տակ ենք գործում, բայց հենց որ Թիֆլիս կամ Բաքու ընկերության ճյուղեր բաց անելու իրավունք ձեռք բերենք — մենք կդառնանք ճյուղ»²⁵։ Այս նամակը, որն հրապարակվում է առաջին անգամ, վկայում է նաև, որ Երևանի գրական խմբակը նիկոլ Աղբալյանին լիազորել էր համոզել Թումանյանին դասախոսություն կարդալ Երևանում «հենց ասենք լեզվի մասին»²⁶։ Երևանի գրական խմբակի ջանքերով 1916 թ. նոյեմբերի 3-ին և 9-ին Երևանում ստեղծվեց գրասերների միություն, որի նըպատակն էր կապ պահպանել «թրքահայ ցար ու ցրիվ գրողների հետ, հավաքել թրքահայ գրականության բեկորները»²⁷, վերականգնել գրական ասուլիսները։ Այս միությունը նույնպես սերտ կապերի մեջ մտավ Հայ գրողների կուկասյան ընկերության հետ և 1916 թ. դեկտեմբերի 10-ին և 18-ին նրանց ներկայացուցիչները մասնակցում էին Թումանյանի ղեկավարած վարչության նիստերին, որոնցում քննվում էին կառավարության՝ Հայ գրողների ընկերությանը տրամադրած 10 000 ռուբլի գումարի տնօրինման, արևմտահայ մասավորականության մեջ բաշխելու խնդիրը»²⁸։

ԳԱԹ, Թումանյանի ֆոնդ, № 285։

²¹ Նույն տեղում։

²² Նույն տեղում։

²³ Նույն տեղում։

²⁴ Թումանյան, Երկերի ժողովածու, հ. 5, էջ 397։

²⁵ Կամակը մեզ տրամադրել է բանաստեղծի դուստրը՝ Թամար Թումանյանը, որի համար շնորհակալություն ենք հայտնում։

²⁶ Նույն տեղում։

²⁷ «Հորիզոն», 7. XI, 1916։

²⁸ ԳԱԹ, Հայ գրողների կուկասյան ընկերության ֆոնդ, № 45/13, 45/16։

Հայկական դպրոցների ուսուցիչների նախաձեռնությամբ նույն ժամանակաշրջանում Հայ գրասիրաց ընկերություն ստեղծվեց նաև Աշտարակում: Առաջինը, ում գիմեց ընկերությունը, դարձյալ Թիֆլիսի գրողների միությունն էր: Գառնիկ Գյուղայանի 1917 թ. փետրվարի 19-ի նամակից պարզվում է, որ Հ. Թումանյանը 1916 թ. ղեկտեմբերի նամակով շնորհավորել և ողջունել է Աշտարակի գրասիրաց ընկերության բացումը²⁹:

Այնքանադրապուրում գործող «Ալագյաղի զավակունք» ընկերությունը բացառություն չէր կազմում: Նրա համար նույնպես կենտրոնը «մայր ընկերությունն էր»³⁰:

Գրեթե չկար հայ գաղթօջախ, որտեղ չստեղծվեր գրական թեկուղ շատ փոքր խումբ և անմիջապես կապ չհաստատեր Հայ գրողների կովկասյան ընկերության հետ: Նոր նախիջևանի հայկական կոմիտեի գրական-գեղարվեստական բաժնի նախագահ Հակոբյի Խաչատրյանը, կոմիտեի լիազորությամբ, 1917 թ. հունվարի 20-ին դիմում է «մայր ընկերության» նախագահ Թումանյանին և հրավիրում նրան Ռոստովում ու Նախիջևանում դասախոսություն կարդալ՝ «նվիրված հայկական կյանքին (բառի ամենալայն իմաստով)»³¹: Հակոբ Սառիկյանին ուղղված Հ. Թումանյանի նամակը վկայում է, որ նա 1917 թ. հոկտեմբերին պատրաստվել է Պլատիգորսկից գնալ նոր Նախիջևան Հայ գրողների ընկերության ճյուղ բանալու և Մ. Նալբանդյանի արխիվը տեղափոխելու նպատակով, բայց հանգամանքների բերումով շտապ Թիֆլիս է վերադարձել³²: 1915 թվականից հայ գրական փոքրիկ խմբակ էր գործում նաև Աստրախանում, որտեղ Մեսրոպ Եպիսկոպոսը դասախոսություն կարդալուց հետո առաջարկում է գոյացրած «գումարների մի մասը ուղարկել Թիֆլիսի «մայր ընկերությանը»³³:

«Մայր ընկերության» աղեղեղությամբ Գորիսում և Գորիում նույնպես առաջացան գրական փոքրիկ խմբակցություններ: Գորու հայ գրասերների խմբակի 1916 թ. 12-րդ հերթական երեկույթը նվիրված էր Հ. Թումանյանին: Նրանք երեկույթներ էին նվիրել նաև Ռ. Պատկանյանին, Ա. Ահարոնյանին, Մուրացյանի «նոյի ագոսիին», Սայաթ-Նովային, Նար-Դոսին, Շիրվանզադեին, Մ. Նալբանդյանին և այլն: Գրական այսպիսի մեծ, համազգային աշխույժություն առաջացումը պետք է վերագրել նաև Հայ գրողների կովկասյան ընկերության երեկույթների գրական-գեղարվեստական և գիտական բարձր մակարդակին: Բերենք միայն մի օրինակ և պարզ կդառնա, թե վարչության, ավելի շուտ՝ Թումանյանի կազմակերպած դասախոսությունները, ինչպիսի ազդեցություն ունեին և պատահական չի թվա, որ մի ընկերության առաջացումը կարող էր այսպիսի լայն մշակութային շարժում առաջացնել ամբողջ հայ իրականության մեջ: 1913 թ. հունվարի 20-ի վարչության նիստում Ա. Աթանասյանը առաջարկեց ընկերության հերթական երեկույթը նվիրել Շանթի «Հին աստվածներ» պիեսին, բայց դասախոսության փոխարեն կազմակերպել զատ: Վերջինս կայացավ 1913 թ. փետրվարի 3-ին: Դատի նախագահն էր Տ. Հովհաննիսյանը, դատավորներն էին Ա. Աթանասյանը, Հ. Ամիրյանը, իսկ Հ. Թումանյանը, Լեոն, Ա. Զարդարյանը, Մ. Թումանյանը և ուրիշներ երգվյալ ատենակալներ էին: Մեղադրողներն էին Մ. Մատենաճյանը, Ա. Հարությունյանը, իսկ պաշտպաններ՝ Գ. Իփեկյանը և Ստ. Լիսիցյանը: Իհարկե, կարելի է ենթադրել, որ երգվյալ ատենակալների որոշումներում ինչ որ չափով պետք է արտահայտություն գտներ նաև Թումանյանի կարծիքը Շանթի այդ գործի մասին: Բայց հարցին պետք է մոտենալ նաև որոշ վերապահությամբ: Պետք է նկատի ունենալ, որ ատենակալների որոշումները կայացվում են մեղադրյալների և դատաւալաշտյանների ճառերի արտահայտած դրույթների հիման վրա և այդ սահմաններում, ուստի ատենակալների որոշումները չեն կարող Թու-

²⁹ Նույն տեղում, Թումանյանի ֆոնդ, № 522:

³⁰ Նույն տեղում, № 292:

³¹ Նույն տեղում, № 348:

³² Հ. Թումանյան, Երկերի ժողովածու, հ. 5, էջ 132:

³³ ԳԱԹ, Թումանյանի ֆոնդ, № 399:

մանյանի անձնական կարծիքի անմիջական և ամբողջական գրանցումը լինել քննվող երկրի մասին: Ինչևէ, բերենք ատենականների որոշումները.

1. «Հին աստվածները» դրամա չէ, այլ դրամատիկական պոեմ:

2. Վանահայրը մեղավոր չէ, բայց վնասակար մտքեր է քարոզում, մեղավոր չէ այն պատճառաբանությամբ, որ յուրաքանչյուր ոք ազատ է ցանկացած գաղափարը քարոզել:

Նույն պատասխանը Աբեղայի վերաբերմամբ:

3. Իշխանուհին, որ ամուսնացել է չսիրած մարդու հետ, նույնպես մեղավոր չէ, որովհետև հայ աշխարհի սովորության համեմատ, հավանորեն, նրան ամուսնացրած կլինեն անշափահաս հասակում:

4. Շանթի երկր դրամա չէ, բայց արժեքավոր է:

5. Պիեսը տիպեր չի տալիս:

6. Նա խորհել է տալիս, բայց չի հուզում:

Վերջինս չէր կարող Թումանյանի տեսակետը լինել Շանթի երկրի մասին, բանի որ նա մեծ նշանակություն էր տալիս ստեղծագործության հուզական բովանդակությանը:

Դատից անմիջապես հետո եղան զմգոհություններ, որոնք արտահայտվեցին մամուլում և թերթերի խմբագրություններին ուղղված բողոք-նամակների մեջ, որոնցում հեղինակները, նկատի ունենալով մեղադրողների՝ Ա. Հարությունյանի և Մ. Մատենճյանի ելույթներն ու պաշտպաններ Ստ. Լիսիցյանի և Գ. Իսիկյանի պատասխանները, գտնում էին, որ «դատը դարձավ վրդովեցուցիչ ու անպատվաբեր թե՛ իրեն՝ Գրական ընկերության և թե՛ մանավանդ Շանթի համար»³⁴, ի պատասխան այդ բողոքողների, Թումանյանը գրում է «Անտեղի ու անպարզ միջոց» հոդվածը, որի զգալի մասը գրողի հրատարակություններում առայժմ տեղ չի գտել: Այս հոդվածից նախ պարզ է դառնում, որ «թե՛ դատախազներից և թե՛ պաշտպաններից յուրաքանչյուրը ինքն է ընտրել իր դերը»: «Դատից հետո, — ասում է Թումանյանը, — ես պատահեցի ին տեսակ վրդովված մարդկանց, որոնք կարծում էին, թե Շանթի դրաման դրամատիկական պոեմ անվանելով, դատավորները նվաստացրել են նրա գործը և եթե մեջը տիպեր չեն գտել, դրանով էլ տապալել են միանգամայն:

Էս կնշնակի գրականությունից և նրա ծառայությունից կամ Մանթրեզոյից հասկացողություն չունենալ միանգամայն: Եվ էս տեսակ հարգանքն ու սերը չեն ուրախացնիլ գրողին: ...Հավատացնում եմ ինը հարգելի գրասերներին, որ իմ տեսակետն էլ բոլորովին տարբեր է եղածներից: Ես ո՛չ արվեստի ու իր՝ օրենքների, ո՛չ անցյալ գրական երկերի օրինակով եմ մոտենում դրական գործին, ո՛չ էլ նրա հասարակական ու գաղափարական արժեքների տեսակետից, այլ ամենից առաջ ուզում եմ ճշտել, գտնել, թե արդյոք նրա մեջ կա՞ ստեղծագործողի կենդանի շունչը, էն որ ամենայն իրավամբ կոչվում է աստվածային, որովհետև նա է միայն, որ գրական արտահայտությանը տալիս է մեծության ու անմահության հատկություն:

Մնացածը և՛ արվեստ, և՛ փիլիսոփայություն, և՛ հասարակական դադափար, և՛ բարոյագիտություն բոլորը գալիս են նրանից հետո: Եթե էն չկա, պրծանք: Էլ ոչ մի արվեստ, ոչ մի հասարակական միտք, ոչ մի մեծ գաղափար օգնել չեն կարող:

Ահա դատավորների ու նրանց դեմ բողոքողների վերաբերմունքից տարբեր մի վերաբերմունք, և սակայն ոչ թե դատի համար չեմ դատապարտում Հայ գրողների ընկերությանը, այլև նրա վարչության նախագահն եմ, որքան էլ տարբեր կարծիքներ հայտնվեն նրա հարկի տակ»³⁵:

Այս հոդվածում Թումանյանը ներկայանում է որպես տաղանդավոր քննադատ, որպես գրաքննադատության հանճարեղ տեսաբան, ազատ, բայց գիտական քննադատության կողմնակից, իբրև դեմոկրատ անձնավորություն:

³⁴ «Հորիզոն», 6. II. 1913:

³⁵ Նույն տեղում, 7. II. 1913:

Այստեղ Թումանյանը բանաձևում է գրական երկը վերլուծելու, գնահատելու հետաքրքիր և կարևոր չափանիշներ: Առաջացած մեծ աշխուժությունը գրական ընկերությանը ստիպեց փետրվարի 7-ին նոր երեկույթ կազմակերպել նվիրված Շանթի «Հին աստվածներին», այս անգամ «Դատից հետո» անվան տակ: Երույթ ունեցան 16 հոգի, այդ թվում Դ. Դեմիրճյանը, Ն. Աղբալյանը, Լեոն: Տ. Հովհաննիսյանը ընդգծեց. «Գրական երկի արժանիքը կախված չէ այն բանից, թե նա ինչ շղույթի է պատկանում: Նույնպես պակասություն չէ նրա համար, թեկուզ որպես դրամայի նրա մեջ արտահայտվող սուրյենկտիվիզմը: Այդ օրվա հանդիսականներից մեկը պահանջում էր դատի ենթարկել գրական ընկերության վարչությանը, որ «նա գրական դատ կազմակերպելով Շանթի պիեսի վրա, նրան կամա թե ակամա նվաստացրել է, մարգարիտը ցեխի մեջ է գցել»: Նրանց պատասխանում է վարչության նախագահ Լ. Թումանյանը հետևյալ խոսքերով. «Գրական ընկերության նպատակներից մեկն էլ այն է, որ նա խիստ, բայց անաշու քննադատության ենթարկե հայ գրական աշխարհում հանդես եկող գրողներին և նրանց երկերը: Թող դրանք պաշտպանվեն, եթե արժանիք ունեն իրենց մեջ»³⁶:

Երեկույթից անմիջապես հետո մամուլում հրապարակվեցին բաղմաթիվ հոդվածներ: Նշենք դրանցից մի քանիսը միայն. Ա. Աթանասյան, «Թե ինչ նստեց Շանթը ինձ վրա», «Մի շանթիստի հիշատակարանից»³⁷ Ֆելիետոններ, Լ. Սուրխաթյան «Գրական դատ»³⁸, Ստ. Մալխասյան, «Դարձյալ «Հին աստվածներին» մասին»³⁹, Ֆլորա Վարդանյան, «Կրկին «Հին աստվածներ» դրամայի շուրջը»⁴⁰, ինչպես նաև բաղմաթիվ առաջնորդողներ ու հաղորդումներ՝ «Գրական հետաքրքրությունը», Լ. Տեր Միրաքյան, «Գրական դատը»⁴¹, «Դատից հետո»⁴², Լ. Թումանյանի «Անտեղի ու անպետք միջոց»⁴³ հոդվածը, «Բաց նամակ Լ. Շանթին»⁴⁴ և այլն:

Շանթի «Հին աստվածներին» նկատմամբ Հայ գրողների կովկասյան ընկերության առաջացրած համընդհանուր հետաքրքրությունը հասավ Բաքու, մինչև Պոլիս, ինչպես գրում է Ն. Ֆրանգյանը. «Ամբողջ մի շանթյան շրջան ստեղծվեց Թիֆլիսում, ինչպես և Կովկասի այլ քաղաքներում»⁴⁵: Բաքվում փետրվարի 24-ին և 28-ին տեղի ունեցան դասախոսություններ՝ նվիրված Շանթի «Հին աստվածներին»: Ընդ որում, դասախոսներից էր Գասպար Իփեկյանը՝ Թիֆլիսի փետրվարի 3-ի գրական դատի պաշտպաններից մեկը: Պոլսում էսալյան սանուց միությունը կազմակերպեց «գրական համախմբություն», որի նյութը դարձյալ Շանթի «Հին աստվածներն» էր: Իր բացման խոսքում Լ. Սիրունին ասաց. «Նմանօրինակ համախմբումներ պիտի տեղի ունենան նվիրված դանախյան թրքահայ գրողներու—Զոհրապի, Վարուժանի, Զարդարյանի, Սիամանթոյի, Զապել Նսալանի մասին»: Այդ օրը Գ. Խաժակը ընդգծեց և հույս հայտնեց, որ. «Գրական այս հետաքրքրության ալիքը, որ Կովկասեն կուգա, հետզհետե տարածվի»: Ատենակալների ու դատավորների փոխարեն այստեղ կազմվել էր ժյուրի, որի անդամներն էին Կոմիտասը, Գ. Զոհրապը, Ռ. Զարդարյանը, Դ. Վարուժանը, Սիամանթոն և ուրիշներ: Ռուբեն Զարդարյանը «շատ գնահատելի գտնելով կատարված ձեռնարկը, մաղթեց, որ երեկույթը ավելի արժարժի և այս հավաքույթներեն շարքեն ծնունդ առնի Թրքահայ գրա-

³⁶ Նույն տեղում, 9. II. 1913:

³⁷ Նույն տեղում, 10. II. 1913:

³⁸ «Մշակ», 6. II. 1913:

³⁹ Նույն տեղում, 7. II. 1913:

⁴⁰ Նույն տեղում, 20. II. 1913:

⁴¹ «Հորիզոն», 13. II. 1913:

⁴² Նույն տեղում, 9. II. 1913:

⁴³ Նույն տեղում, 7. II. 1913:

⁴⁴ Նույն տեղում, 17. II. 1913:

⁴⁵ Նույն տեղում, 9. XII. 1915:

կան միութիւնը»⁴⁶, եւ իրօք, Թումանյանի նախագահած Հայ գրողների կովկասյան ընկերութեան առաջացրած ոգևորութեան շնորհիւ այդ շրջանից Պոլսում գրվում է գրական ասուլիսների հիմքը: Եթէ առաջին ասուլիսը Շանթի մասին էր, ապա երկրորդը էսայան սանուց միութիւնը նվիրեց Գ. Զոհրապին: Լիւս աթիլի գրված գրախոսականում ն. Աղբալյանը արձանագրում է. «Մեր ընթերցողներին հայտնի է Շանթի «Հին աստվածների» խանդավառ ընդունելութիւնը Թիֆլիսում առիթ դարձաւ, որ Պոլսում ևս ուշադրութիւն դարձնեն նրա վրա և այստեղ կազմակերպված գրական հանդեսների նման, որի նախաձեռնողը եղաւ Հայոց գրողների ընկերութիւնը, Պոլսում ևս կազմակերպվեն գրական ասուլիսներ»⁴⁷: «Եւ չպետք է դարձանալ,— կարդում ենք ժամանակի մամուլում,— որ հազիւ խանձարուրից դուրս եկած՝ նա (ընկերութիւնը) մի շարժում մտցրեց ոչ միայն մեր հարևան Բարբում, այլև շատ ավելի հեռու վայրերում, սահմանի այն կողմը՝ Պոլսում: Ամենքը զգում են... որ կազմակերպվում է հայոց մտավորական դասը... մանավանդ մնացած ուժերով մի համադրական գործ կատարելու, որի բնույթն ու շահերը դժվար է նախորոշել...»: Ընդգծելով ընկերութեան գործունեութեան անհրաժեշտութիւնն ու նրա նշանակութիւնը, գրականութեան դերը, վերոնշյալ հոգովածի հեղինակը շարունակում է. «Հայոց ընկերութիւնը դառնում է ազգային ինքնագիտակցութեան մի կենդանի պորձոն, որքանով մի ազգի ոգին արտացոլվում է նույն ազգի գրականութեան մեջ և ինքնագիտակցութեան կարելի է հասնել նույն այդ գրականութիւնը ճանաչելով և գնահատելով:

Գրական ընկերութիւնը կոչված է առաջին պաշտպանը դառնալու հայոց գրականութեան և հայ գրականի, բարձրացնելու հայ մտքի և զգացումի հեղինակութիւնը մեր շրջապատում: Նա դառնալու է մի մտերիմ ու հարազատ օջախ, ուր ամեն անգամ կարող է մտնել անբռնազրոյս՝ ինչպես իր տունը... Կրական ընկերութեան նպատակը նյութականից առաջ՝ բարոյական է և քաղաքական, և արդեն հայ գրչի և գրականութեան բարոյական հեղինակութիւնը բարձրացնելու համար է, որ ձեռնարկված է գրական մշակների նյութական բարվարումին»⁴⁸:

2. Թումանյանի անձը, նրա ցանկացած նախաձեռնութիւնը չէր կարող անարձագանք մնալ: Բնականաբար, Թումանյան-անձի հմայքը, հասարակական գործունեութեամբ խանդավառվելու հատկութիւնը չէր կարող չտարածվել իր շրջապատի և առաջին հերթին իր ընտանիքի անդամների վրա: Դեռ բանաստեղծի կենդանութեան օրոք նրա պալակաները սկսեցին իրենց հասարակական հանրօգուտ գործունեութիւնը: Հայ գրողների կովկասյան ընկերութեան Էրեկուլթներին, դասախոսութիւններին և դրանց շուրջ ծաղած գրական բանավեճերին ու քննարկումներին մասնակցում էր նվարդ Թումանյանը: 1914 թ. մարտի 27-ին «Հայ կնոջ դերը գրականութեան մեջ» թեմայով ընկերութեան 31-րդ երեկոյթին իր հայրիկի հետ միասին ելույթ է ունենում նաև դուստրը: Միասնական նվարդ Թումանյանը ղեկավարում է երկու հասարակական կազմակերպութիւն: Նա Հայ օրիորդաց և Հայ ուսանողների կուստորական միութեան նախագահն էր: Վերջինս հիմնվել է 1917 թ. նոյեմբերի 26-ին: Նրա նպատակն էր Թիֆլիսի հայ ուսանողներին ծանոթացնել գլխավորապէս հայ և ընդհանուր կյանքի հասարակական, տնտեսական և քաղաքական դրութեան հետ, ուսումնասիրել հայ լեզուն, գրականութիւնը, պատմութիւնը, հարաբերութեան մեջ մտնել նույն նպատակով ստեղծված այլ ազգութիւնների ուսանողական կազմակերպութիւնների հետ: Նվարդ Թումանյանի արխիւում պահպանվել են այդ միութիւնների վարչութեան արձանագրութիւնները, որոնցից տեղեկանում ենք, որ նա աշխատել է հիմնել նաև հայ գրականութիւնն ու գեղարվեստը ուսումնասիրող ընկերութիւն:

⁴⁶ Նույն տեղում, 19. III. 1913:

⁴⁷ Նույն տեղում, 5. V. 1913:

⁴⁸ Նույն տեղում, 28. III. 1913:

Այսպես, Թումանյանի նախագահած ընկերությունն իր ստեղծումով և գործունեությամբ հսկայական աշխուժություն առաջացրեց ողջ հայ իրականության մեջ: Միայն Թումանյանի պես հանճարեղ մտածողն ու գրական-հասարակական գործիչը, հարազատ ժողովրդի մեծ նվիրյալը կարող էր իրարից հալոարարոր կիրմետրերով հեռու գտնվող հայության տարբեր հասավածներում առաջ բերել գրական միևնույն մթնոլորտը, երկփեղկված ժողովրդի բեկորները միացնել մշակութային հղոր կապով: Մեծ նշանակություն տալով միասնական հայ ազգային գրականություն ունենալու և այն ընդհանուր ուժերով զարգացնելու հարցին, Թումանյանը գրում էր. «Ամեն բաղաքից էլ, որ ձեն ձենի տանք—դուրս կգա մի մեծ ձեն, հայ ժողովրդի ձենը: Սրանից լավ էլ ի՞նչ կարող ենք անել»⁴⁹, եվ Թումանյանին հաջողվեց լսել հարազատ ժողովրդի նրվիրական ձայնը, հանուն որի նա չխնայեց ոչինչ, իր շատ թանկ ժամանակը, որի ընթացքում այնքան զուլսգործոցներ կարող էին ստեղծվել: Որպես նախագահ Թումանյանը արտակարգ որևորված էր իր ընկերության աշխատանքներով, քանի որ կարողացել էր ստեղծել «մեր երկիրը, մեր ժողովուրդը, մեր գրականությունը լուրջ ուսումնասիրելու»⁵⁰ հնարավորություն: Հարազատներին նամակներ գրելիս երբեք չէր մոռանում նրանց տեղյակ պահել գրողների ընկերության գործերին: Որդուն՝ Արտավազգին, գրում է. «Մեր գրական երեկույթներն էլ շատ լավ են դնում: Դասչի՞ք մեծացրել են, ավելի լավ ու մեծ բեմ են շինել, և ժողովուրդը միշտ էնպես է լիքը, որ նստելու ունի չի լինում»⁵¹: Մարգար Ավետիսյանին ուղղված նամակում կարդում ենք. «Ձեռ կարող երևակայել, թե ժողովուրդ, ինտելիգենցիա և երիտասարդություն, և աշակերտություն ինչ հոսանք է առել դեպի ընկերությունը»⁵²: Ահա ինչով էր ուրախանում Թումանյանը: Բանաստեղծի դուստրը՝ Նվարդը, պատմում է, թե ինչպես Վահան Տերյանը ափսոսում էր «հայրիկի կորցրած ժամանակը՝ նրան դուր չէր գալիս, որ հայրիկն էր երեկույթ կազմակերպում, բացման խոսք ասում... մանավանդ, երբ երեկույթի ժամանակ տեղից վեր էր կենում և ուշացած պատվավոր հյուրերին աթոռ առաջարկում...»⁵³:

Մակաչի որքան էլ ընկերներն ու մտերիմները քանային հանուն գրականության արգելել Թումանյանին նախագահություն անել զանազան հիմնարկներում, որքան էլ ինքը՝ Թումանյանը, հաճախ մենակությունը աստվածային զգացում համարեր, որքան էլ Տերյանը զայրանար, միևնույն է, Թումանյանի պատասխանը մեկը պիտի լիներ. «Դատարկ բաներ են ասում, Վահան, էսպես է լինելու մեր կյանքը»⁵⁴: Թումանյանը երբեք չէր կարող կտրվել հասարակությունից, քանի որ նա իր կյանքով ու գործունեությամբ հարազատ ժողովրդի ապրումների անդրադարձումն էր:

ОВАНЕС ТУМАНЯН И КАВКАЗСКОЕ ОБЩЕСТВО АРМЯНСКИХ ПИСАТЕЛЕЙ

СУСАННА ОВАНЕСЯН

Резюме

Кавказское общество армянских писателей, основанное в 1912 г. в Тифлисе, сыграло в дооктябрьский период огромную роль в армянской

49 Հ. Թումանյան, Երկերի ժողովածու, հ. 5, էջ 397:

50 Նույն տեղում, էջ 387:

51 Նույն տեղում, էջ 393:

52 Նույն տեղում, էջ 397:

53 Նվարդ Թումանյան, Հուշեր և գրույցներ, Երևան, 1969, էջ 115:

54 Նույն տեղում:

общественно-литературной жизни. Инициатором и бессменным руководителем этого общества был великий армянский поэт Ованес Туманян. Своей деятельностью ему удалось вызвать большой интерес к вопросам средневековой армянской литературы, истории армянской литературы, к вопросам литературы и искусства других народов.

Одновременно под влиянием деятельности Кавказского общества армянских писателей в 1910-е годы в Тифлисе, Константинополе, Баку, Ереване, Александрополе, Астрахани, Новой Нахичевани (Ростов-на-Дону) и других городах были основаны литературные и национально-культурные общества и объединения. Многие из этих литературных группировок проявили желание включиться в Кавказское общество армянских писателей в качестве отдельного ответвления. Несколько позднее в разных городах создаются независимые литературные общества и группировки, которые, установив тесные контакты с Кавказским обществом армянских писателей, признают его приоритет. В деле оживления, активизации литературного движения тех лет определенную роль играли мероприятия, организуемые Кавказским обществом армянских писателей.